

# WAKITÀ UWANA POL ATSETSÈR À AZLA KOLOSƏYA Lettre de Paul aux Colossiens

## *Ayyi*

<sup>1</sup> Gi Pol uwana Zəzagəla akəsàni gi, kà gi aña magay masləlay aña Yesu Kristu, gətsetser à akul wakità uwanay, wakità aguwa à uda la ahàl aña Timotawus, uwana masla bay kà deda gami la madijal gəl à vok la abà. <sup>2</sup> ‘Ayyi’, məgod à akul, akul tsəhay aña Zəzagəla, uwana akul la ahàl aña Yesu Kristu, uwana kanəfaw la ləv tekula. Zəzagəla Baba gami apis à akul gay à vok, ɲgaha avà à akul lapiya.

## *Pol adəv kufa à Zəzagəla kà aña azla Kolosəya*

<sup>3</sup> ‘Kikay’, məgod, à Zəzagəla, Baba aña Sufəl gami Yesu Kristu, kəla kaslā gesina uwana mədəv kufa kà akul. <sup>4</sup> Kikay məgod, kà uwana mətsənəɲ kà kavàw ləv aɲkul à Yesu Kristu, ɲgaha kawoyaw azlatsəhay aɲha gesina babay. <sup>5</sup> Kadahawwanɲ kiya uwanay kà, kà uwana kafəw yewdi à tatak delga uwana à gay, Zəzagəla adafehəɲ à ahəɲ kà aɲkul la zagəla, uwana katsənàwwənɲ ɲgaha adabəzawwanɲ tsərəh à slaka aɲkul. <sup>6</sup> Gay marabəɲ uwaga aslèh gəl à ahəɲ gesina la gudəɲ la vok, apakay bokuba mən ahàf uwana av mayyay, ɲgaha aɲazilā kaykay. Kiya uwaga à gay marabəɲ uwaga, ada à huma

à gay la tataka aṅkul la abà, dagay la mavakay teraṅa uwana katsènàw tapèh lakèl aṅa gay aṅa vok mahamay aṅa Zəzagəla dadàṅ la dziriga, tsərəh à lakana. <sup>7</sup> Katapawla tatak uwaga kà la slaka aṅa Epafəras, uwana məwoyaṅ. Anina kà, anu azlaməna madfàh sləray aṅa Yesu Kristu. Adfàh sləray la ləv tekula, adfàh sləray la slaka aṅkul kà madegolay anu. <sup>8</sup> Masla la uwana apèh à anu gay aṅkul, bokuba uwana Masasəḍok Zəzagəla avà à akul ndzəḍa kà mawoy azlaməna magay aṅkul.

<sup>9</sup> Kà uwaga, dagay mavakay uwana mətsənà uwaga, mədavàh kufà à Zəzagəla kà aṅkul la kaslà gesina. Mədəv kufà à Zəzagəla kà akul aṅa masəlay la paraka, uwana akəsəl à gəl, ṅgaha kabəzaw matsihila uwana Masasəḍok aṅha avà, ṅgaha akul aṅa matsən azlatatak la tetəvi aṅha la tsəh. <sup>10</sup> Kà uwaga kadàbəzaw maday delga, uwana akəsa à vok kà aṅa Sufəl Yesu Kristu, ṅgaha kadàḍfahawla uwana akəsəl à gəl gesina, maday aṅkul adàda à huma à gay la madfàh delga, ṅgaha kadəsəlaw Zəzagəla kaykay. <sup>11</sup> Mədəv kufà babay kà masla adzərəḍfahakulla aṅa deyday, ṅgaha akul aṅa madz à ahəṅ la mabasiṅ la abà la ləv tələmna. <sup>12</sup> 'Kikay', gòḍaw à Zəzagəla Baba, uwana apəzl à akul tetəvi, kà akul aṅa mabəz tatak uwana adfahàṅ à ahəṅ, kà aṅa tsəhay aṅha la zagəla la afik babay, la slaka uwana uḍfaka aṅha la ahəṅ. <sup>13</sup> Zəzagəla Baba atəfanula à makoray aṅa mələs la abà, masla la uwana abək anu à makoray aṅa Kona aṅha uwana à abà, awoyaṅ. <sup>14</sup> Masla la

uwana apèlla anu ala, ngaha amatsàn tsakana gami ala.

*Yesu kà Sufèl lakèl anja tatak gesina*

<sup>15</sup> Dza adanəŋ Zəzagəla la yewdi aw, ama Yesu Kristu uwana azladza tanəŋəŋ kà, masla la uwana maftsa vok anja Zəzagəla, à masla uwana malkwoy anja, uwana aduwa azlatatak gesina, uwana Zəzagəla adfahəŋ. <sup>16</sup> Zəzagəla adfahə tatak gesina kà la ahəl anja, azlatatak uwana la zagəla la afik, la azlatatak uwana la kutso la abà la vədfah, la azlatatak uwana yewdi anəŋəŋ, la azlauwana yewdi anəŋəŋ aw babay. La ahəl anja Yesu adfahə uwaga, kəla azlatatak gesina, uwana atà la ndzəfa la zagəla, baməraka sufèl anja azlamalika bay. Kəla azlatatak gesina uwana tasafay, la azlauwana tasafay aw. Zəzagəla adfahə atà la magolla à uda la ahəl anja Kona anja, ngaha abèk atà à ahəl anja. <sup>17</sup> Masla kà, aga la ahəŋ dagay uwarà, à mok uwana gudəŋ à vok adzəka à vok dadəŋ aw, tatak dèwdèw kà la ahəl anja, masla la uwana akəs atà la slaka anjatà la abà. <sup>18</sup> Masla la uwana madzahaga anja maham à ahəŋ mənə gay Zəzagəla gesina. Maham à ahəŋ mənə gay Zəzagəla kà, apakà kà bokuba vok anja. Masla la uwana adzəkà sifa mawga. Babay kà, masla la uwana matera anja mawul à uda la mamətsay, kà masla anja madfuwəŋ azladza gesina, la azlatatak gesina. <sup>19</sup> Akəs à Zəzagəla à gəl kà madz à ahəŋ anja kà, agay kà madz à ahəŋ anja Kona anja. <sup>20</sup> Zəzagəla akəs kà, masləl Kona anja à ahəŋ, kà masla anja masəl vok, à masla la azlatatak gesina, azlatatak

uwana la vɔɔfah la azlatatak uwana la zagɔla la afik, ŋgaha afà masɛl vok à tataka aŋha à abà la azladza, adfahà uwaga kà la aŋiz aŋa Kona aŋha uwana akòlla à ahɛŋ la ahàf la adi.

<sup>21</sup> Uwarà kà, akul kɛrkɛr la Zɛzagɔla, kagàw azlamɛna mɛzam aŋha, kà uwana kadzugwaw kà azlatatak mawisiga, kadfahàwwàŋ kà azlatatak mawisiga babay aya. <sup>22</sup> Ama lagonay kà, Zɛzagɔla adasɛl vok la anu la mamɛtsay aŋa Kona aŋha, uwana apakà dza slɛb vok aŋha, uwana akɛs mas ŋgɛrpa, kà akul aŋa magay azladziriga. Ŋgaha kà masla mapɛhla à akul ala la huma aŋa Zɛzagɔla, kokudfa mawisiga, sɛtaka, kà dza aŋa madfukw à akul ala seriya à gɛl aw. <sup>23</sup> Iyay, dàw à huma à gay la mav lɛv aŋkul à Yesu, dzàw à ahɛŋ titi kà fafàlàw aw. Fàw slɛm kà azlagay uwana à afik katsɛnàwwàŋ la gay marabɛŋ la abà. Gay marabɛŋ uwaga kà, tazàŋ à kɛla dza la gudɛŋ la vok gesina. Gi Pol babay, slɛray gulo kà maz gay marabɛŋ uwaga babay.

*Pol azlak azlamɛna madiŋal gɛl à vok*

<sup>24</sup> Lagonay, gi la marabay la lɛv gulo la tsɛh, kà ŋgɛrpa uwana gɛsay kà aŋkul, bokuba uwana uwarà Yesu Kristu asà. Gɛsa ŋgɛrpa la vok gulo babay kà maham à ahɛŋ mɛna gay Zɛzagɔla, uwana vok aŋha. Gɛs ŋgɛrpa kiya uwanay kà, kà slɛray aŋha aŋa mahɛnla. <sup>25</sup> Zɛzagɔla afà gi à ahɛŋ, kà masla slɛray aŋa azlamɛna aŋha, kà gi aŋa mazlak akul. ‘Zà gay uwanay à azladza gudɛŋ à vok gesina!’, agòɔf à gi. <sup>26</sup> La mɛl uwarà kà, ahadà gay uwaga à ahɛŋ dadàŋ, azladza tasɛl aw. Ama lagonay kà, adasɛlla à azladza uda la

dazuwaya. <sup>27</sup> Asà à Zəzagəla mapəhla à azladza kà uwana asal madfehəŋ, kà aduwa azlatatak gesina. Gay mahad' à ahəŋ gà uwaga, adasa à uda la dazuwaya, kà uwana Yesu Kristu la ləv ankul la tsəh. Kà uwana kasəlaw kà, Zəzagəla adàdala akul à mazləbay anha à abà. <sup>28</sup> Uwaga ka Yesu Kristu uwana məpəhla à azladza, məpəh à azladza à vok à abà gesina. Mətəpatàla tatak la matsihila uwana Zəzagəla avà à anu. Asa à anu kà azladza gesina uwana la tetəvi anja Yesu Kristu la tsəh kà, tadəgay azlazilga. <sup>29</sup> Kiya uwaga gədəgədəŋ à afik kà, gəwad' vok à uda la ndzəda uwana Yesu Kristu avà à gi, kà gi anja madəvla sləray uwanay à gay.

## 2

<sup>1</sup> Asa à gi, kà kasəlaw kà, gədadfah sləray mənğa kà ankul azla Koloseya, ŋgaha kà anja azla Lawodikiya babay, ŋgaha kà anja azladza anik gesina, uwana tanəŋ gi la yewdi aw bay. <sup>2</sup> Gəfehəŋ kiya uwanay, kà ləv ankul anja magay la ndzəda, ŋgaha kà akul anja mawoy vok akul à akul, la ləv tekula. Asa à gi babay kà, kasəlaw dziriga uwana Zəzagəla afətal à ama ala, lakəl anja Kristu, kà akul anja madz à ahəŋ la abà lela, ŋgaha Zəzagəla anja mapisakulla gay à vok kà anja uwaga. Tatak uwana Zəzagəla afətanula à ama ala kà, kà Yesu Kristu. <sup>3</sup> Yesu Kristu uwaga kà apəzl à anu tetəvi, kà anu anja magay anu azlamatsihilaga, ŋgaha kà anu anja matsən tatak uwaga. Matsihila uwaga kà bokuba ləmana.

<sup>4</sup> Gəpəh à akul kiya uwanay kà, kà dza aṅa mavavar akul la azlagay namnamga aw. <sup>5</sup> Baməraka gədagay kərəkər la akul, koksikoksi gədzugway kà akul. Gi la marabay kà uwana à uwana kaɗahàwwàṅ gesina kà la tetəvi aṅha, ṅgaha la uwana kavàw ləv aṅkul à Kristu, kadzàw à ahəṅ lela.

*Sifa aṅa azlauwana tahamà gay à vok la Yesu Kristu*

<sup>6</sup> Lagonay kà, kakəsàw kà Yesu Kristu kà Sufəl aṅkul. Kiya uwaga kà, dàw la maham gay à vok la abà la masla. <sup>7</sup> Dzàw à ahəṅ la ahəl aṅha bokuba ahàf uwana adàla slilih à kutso à agu kərəkər. Dàw kà à huma à gay. Gəɗàwàṅ à afik à maval ləv aṅkul bokuba uwana tatàpakulla. Kikay gòɗàw à Zəzagəla koksikoksi babay.

<sup>8</sup> Dahàw hanəkəli kà dza aṅa mavavar akul la matsihila deydayga aw. Matsihila uwaga kà, asa à uda kà la madzugway aṅa dza la abà, ṅgaha la azlamasasəɗok mawisiga, uwana atà la vəɗah la gudəṅ uwanay à vok. Asa à waṅ kà la slaka Kristu aw. <sup>9</sup> Katsəbaw à atà sləm aw, kà uwana madz à ahəṅ aṅa Zəzagəla kà, aga la Yesu Kristu la abà gesina. Ndzer madz à ahəṅ aṅa Zəzagəla gesina, Yesu Kristu adzà à ahəṅ kiya uwaga babay haɗay. <sup>10</sup> Tsa akul kahamàw gay à vok la masla kà, akul kabəzaw sifa aṅha la dziriga babay. Masla kà, aga lakəl aṅa tatak gesina, la azlamasasəɗok uwana atà la maslay bay.

<sup>11</sup> La maham gay à vok la masla la abà kà, Zəzagəla adafa à akul masəlay aṅha à vok,

uwana apəhla à azladza kà akul azlaan̄ha. La zamana uwarà kà, agòɔf à azla Yahudiya kà takadav vok à uda, kà masəlay kà azlaan̄a Zəzagəla. Ama kà aŋkul kà, masəlay uwana afà à akul à vok kà, asa à uda kà la ahàl aŋa dza aw, asa à uda kà la ahàl aŋa Yesu Kristu, sèlàw kà, masla la uwana azəb à akul à vok ala madz à ahəŋ aŋa uwarà. <sup>12</sup> Mok uwana taɔfahàkulla batem, uwaga apəhla ala kà talà akul, akul la Kristu la slaka gā. Mok uwana kasàw à uda la iyaw la abà, uwaga apəhla ala, kà akul la Kristu, akul kawùllaw à uda la slaka gā la masla aya, kà uwana kaɔŋàwwal gəl à vok, kà Zəzagəla à uwana awùlla Yesu à uda la mamətsay, kà masla la maslay kà mawulla akul à uda babay. <sup>13</sup> Dagay uwarà kà, kagàw bokuba azlamazimnekid̄f kà uwana kaɔfahàhàw tsakana, kà uwana kagàw azladza aŋa Zəzagəla aw. Lagonay kà, Zəzagəla adavà à akul sifa mawga la Yesu Kristu, ŋgaha adamatsan tsakana ala, adamatsakullan̄ ala, ŋgaha adamatsanun̄ ala suwan̄. <sup>14</sup> Uwarà kà, seriya akəs anu, kà uwana məɔfahà uwana ‘Dahàwwàn̄’, Zəzagəla agòɔf aw, la lig la ahəŋ Zəzagəla azəb anu tsakana lakəl ala. Apəl guma, uwana agà la anu lakəl, afà uwaga à gəl aŋa Yesu Kristu, à mok uwana aməts à ahàf à adi. <sup>15</sup> Mok uwana Yesu Kristu aməts à ahàf à adi kà, azəbà maslay aŋa azlamasasəɔfok mawisiga ala, ŋgaha la azlasufəl aŋatà gesina babay, akəɔàs̄l atà, ahahay atà à tsəh, apəhla atà ala la slaka azladza, la paraka kà, aɔfwa atà gesina.

<sup>16</sup> Tsa baŋa kiya uwaga kà, dza asləha à

akul à vok lakəl aña azlatatak uwana kazuwaw la uwana kasaw aw, dza aslaha à akul à vok aya bay la magoday: ‘Sləkàwàw madəvaday la azlamavakay anik anik, ngaha la azlamanəŋla təla la azlavud maduw ləv aw.’ <sup>17</sup> Azlatatak uwaga kà maftsa à vok aña uwana apahàh à azladza tatak uwana adàpaka vok. Ama dziriga aña tatak uwaga kà Yesu Kristu la gəl aŋha. <sup>18</sup> Kavàw tetəvi à azladza kà madfukw akul à uda la masik aŋkul la abà aw. Azladza uwaga tagòd kà, say mawoy mas ngərpa, ngaha la masləkaw azlamalika. Atà tapəhay kà azlatatak uwana tanəŋəŋ la masasiŋay la abà. Azlatsəhay dza uwaga kà azlazlapay deyday, tadzugw lakəl aña azlatatak aña gudəŋ à vok uwanay pəra. <sup>19</sup> Atà la maham à gay à vok la abà la Sufəl Kristu aw. Kà uwana masla kà gəl gà, ngaha maham à ahəŋ məna gay Zəzagəla la uwana vok aŋha. Azlauwana tahamà gay à vok la masla, avà à atà azlatatak uwana tanàkudə aŋha, kà masla la uwana tahamà gay à vok tekula, kiya uwaga tazigəŋay la tetəvi aŋha la tsəh, bokuba uwana asa à Zəzagəla. Masla ahamà gay azladza uwaga à vok la slaka gà, kà masla la atà aña magay tekula, bokuba vok aña dza, uwana tadza à ahəŋ la slaka gà la azlaamil ngaha la sləb vok.

### *Mamətsay la Kristu*

<sup>20</sup> Kasəlaw kà, akul gesina kamatsàw la Kristu. Kiya uwaga kà akul la tsəh aña azlamasasəfok uwana la gudəŋ la vok aw. Kayyà, tsa baŋa kiya uwanay kà, kakay à maday aŋkul ma? Kiya aña azladza uwana tasəl Yesu Kristu dadəŋ



aw takay? Kay, kà mana kanəfaw mapəhay aŋatà uwana apəhay: <sup>21</sup> ‘Katap ahəl à azlatsəhay tatak uwaga à abà aw, katap tatak uwaga aw, kadəbani tatak uwaga aw’, ma? <sup>22</sup> Tsəhay mapəhay uwaga kà matapla deyday aŋa azladza, azlatatak uwaga gesina azladza tadàhla sləray kà tadəzahla. <sup>23</sup> La madzəka, say madəv kuɖa à Zəzagəla, la manəf maslhay aŋha, ŋgaha la mawoy sləb vok aw, ŋgaha la mas ŋgərpa à vok. Ama bà la uwaga manəfay aŋa mapəhay uwatà, azlaka dza tetuwa aw, kà dza aŋa magay la maslay lakəl aŋa azlatatak mawisiga uwana abiy dza aw.

### 3

#### *Mawul à uda la Kristu*

<sup>1</sup> Kasəlaw kà, akul gesina kawùllaw à uda la mamətsay la Kristu. Tsa kiya uwanay kà, fəw yewdi aŋkul kà à azlatatak uwana agay la zagəla la slaka uwana Yesu Kristu adza à ahəŋ, adadza madzay la ahəl kaf aŋa Zəzagəla.✧ <sup>2</sup> Koksikoksi dzùgwàw kà à azlatatak uwana la zagəla la afik, awkà azlatatak uwana la gudəŋ la vok aw. <sup>3</sup> Kasəlaw kà akul kamətsàw. Zəzagəla awùlla akul à uda, avà à akul sifa mawga, uwaga à ahəl aŋa Yesu Kristu, uwaga kà Zəzagəla anəŋla la slaka aŋha. <sup>4</sup> Kristu la uwana sifa, ŋgaha masla dziriga aŋkul. Mok uwana adàwul à wəŋ aya kà, akul bay, kadəpəhawla vok ala la masla, kəla uwabeyuwi adənəŋ mazləbay uwana avà à akul.

#### *Madz à ahəŋ mavivaga la mawga*

✧ **3:1** 3.1 Mahabay 110.1

<sup>5</sup> Kiya uwaga kà, kanəfaw tsəhay maday mawisiga ankul, uwana la gudəŋ la vok aw, azlatatak uwaga kà tapakàh kà bokuba azlatatak deyday la yewdi ankul. Sàkàw à mabila, kagaw la maday mawisiga aya aw, azlatatak mawisiga uwana takəɗ à akul ala à yewdi, atà tadza à ahəŋ la akul la abà aya aw, kayahaw azlatatak mawisiga aw, kakəɗfaw yewdi à azlatatak à abà aw, kà uwana baŋa kakəɗfaw yewdi à abà kawoyaw, atà ɗaɗuwa Zəzagəla. <sup>6</sup> Kà azlatatak mawisiga uwaga à uwana Zəzagəla apakà ləv lakəl aŋa azladza uwana takəs gay aŋha aw. <sup>7</sup> Uwarà, à mok uwana kadzàw à ahəŋ la azlatatak uwaga la abà, maday ankul kà agàh kà kiya uwaga babay.

<sup>8</sup> Lagonay kà, sàkàw azlatatak uwaga gesina. Kapakaw ləv aw, kaslahaw məl la tsəh ala aw, kadahaw mawisiga à azladza anik à vok aw, kadawla sləm aŋa azladza la gay aw. Azlagay mawisiga tasa à waŋ la gay ankul aya aw. <sup>9</sup> Kavavarahaw vok kà akul à akul aw, kà uwana kasakaw maday mawisiga ankul uwana uwarà, ŋgaha la azlatatak uwana kadhàhàwwàŋ uwarà. <sup>10</sup> Nəfàw madz à ahəŋ mawga. Zəzagəla la uwana avà à akul maday mawga, adàhla sləray koksikoksi, kà masla aŋa mapakəŋ ala kiya aŋha, kà akul aŋa masəl masla la dziriga. <sup>11</sup> Kiya uwaga kà, tatak la ahəŋ avàh azla Yahudiya ala la azlatsəhay anik aw, ŋgaha tatak la ahəŋ avàh azlauwana takadav atà à uda ala la azlauwana kokudfa makadav atà à uda gà, ŋgaha azladza uwana la kəsaf la abà, ŋgaha azladza uwana tasəl tatak aw, ŋgaha azlamayà

la azlauwana takor gəl aṇatà, gesina aṇatà kà kalkal, gərgər la ahəṇ la huma Zəzagəla aw, kà uwana mənḡa aṇatà kà say Yesu Kristu tekula pəra, ṅgaha aga la ləv aṇa azlauwana la tsəh azlaaṇha gesina.

<sup>12</sup> Awul akul à gəl kà, Zəzagəla atsatsàmàni akul, kà akul aṇa magay azlaaṇha, awoya akul. Tsa kiya uwanay kà, dəhàw azlatatak uwanay: Vok ahamà akul kà azladza anik, gəw la ləv delga, gəw tələmma, la mabasiṇ gesina babay.

<sup>13</sup> Tsənàw vok gay kà akul à akul. Baṇa dza adahàkulàṇ mawisiga à vok matsawallaṇ ala. Matsahawwaṇ à vok ala kà akul à akul, bokuba uwana Sufəl gami amàtsàkullàṇ ala. <sup>14</sup> Tatak uwana aduwa azlaanik gesina kà, wòyàw vok kà akul à akul, kà uwana mawoy vok akəs azlatatak delga gesina. <sup>15</sup> Vəw tetəvi kà à lapiya uwana Kristu afà à akul à ləv à tsəh, akòr ləv aṇkul. Awul akul à gəl kà Zəzagəla azalà akul, kà akul aṇa magay tekula, ṅgaha akul aṇa magay la lapiya. ‘Kikay’, gòdàwwal koksikoksi babay. <sup>16</sup> Fàw gay aṇa Kristu à ləv à tsəh lela, dzùgwàw kà à gay aṇa Kristu. Tapawla kà vok akul à akul, wulàwla kà vok matsihila kà akul à akul. Zlèbàw Zəzagəla la ləv aṇkul gesina la azlamahabay anik anik. <sup>17</sup> Uwana kadahawwaṇ la uwana kapəhaw bay, dəhàw uwaga la sləm aṇa Sufəl Yesu. ‘Kikay’, gòdàw à Zəzagəla Baba kà Yesu babay.

*Maday aṇa azlaməna madiṇal gəl à vok la huma azladza anik*

18 Gəpəhay kà akul azlamis, gəgodf à akul kà: 'Kəsàw gay aña azlazil aṅkul, bokuba azlauwana tanəf Sufəl gami tadehəŋ.'

19 Akul azlazil bay kà: 'Wòyàw azlamis aṅkul, kagaw dzaṅdzaṅ la atà aw.'

20 Akul azlabəza uwana gəpəh à akul kà à aganay: 'Tsəbàw sləm à paṅaw aña azlababa aṅkul la tatak gesina la abà, kà uwana akəs à Sufəl à gəl, kà kadahawwanṅ kiya uwanay.'

21 Kà aṅkul azlababa kà: 'Kadawla ləv à azlabəza à hudf, kà atà aña mapak ləv aw.'

22 Akul azlamayà: 'Kəsàw gay aña azlaməŋga aṅkul la ahəl ala la gudəŋ uwanay la vok la azlatatak gesina la abà, kakəsaw atà gay la ahəl ala la huma yewdi aṅatà pəra, kà atà aña masləkaw akul aw. Ama dəhàw sləray la ləv tekula, kà uwana kasləkawaw kà Sufəl Yesu.

23 Kəla sləray gesina uwana tavà à akul, dəhàw uwaga la ləv tekula, kà uwana sləray aña Sufəl la uwana kadahawwanṅ, awkà aña dza asik aw.

24 Sèlàw kà Sufəl la uwana adanəŋ akul à adi, adàvə à akul tatak uwana adadehəŋ à ahəŋ la zagəla kà aña azladza aṅha. Madzahaga aṅkul uwana kadahawla sləray, uwaga kà Yesu Kristu.'

25 Ama azladza uwana tadehəŋ mawisiga, Zəzagəla adàwulla à atà ala mawisiga uwana tadəhəŋ. Adəh tatak à azladza gesina la ləv tekula.

## 4

1 Gəpəhay kà à azlaməŋga babay, gəgodf à akul kà: 'Gàw dziriga la huma aña azlamayà aṅkul, dzàw à ahəŋ la atà, bokuba uwana akəsa à vok,

sèlàw kà, akul azlaməŋga la azlamayà gesina kà: Madzahaga aŋkul aga la zagəla la afik, aduwa akul gesina.'

### *Azlamapəhay anik*

<sup>2</sup> Dèvaw kudfa à Zəzagəla koksikoksi, kadəvaw kudfa la guɓguɓ aw. 'Kikay', gòfaw à Zəzagəla babay. <sup>3</sup> Dèvaw kudfa kà aŋami babay, kà Zəzagəla aŋa mapəzl anu tetəvi delga, kà maz gay aŋha à azladza, ŋgaha məpəhatàla godega aŋa gay aŋa Kristu la makor gəl la abà, kà gay marabəŋ uwaga à uwana gi la daŋay. <sup>4</sup> Dèvaw kudfa à Zəzagəla kà gi aŋa mapəhla ala la paraka bokuba uwana akəsa à vok ləla.

<sup>5</sup> Dahaw haŋkəli la madz à ahəŋ aŋkul la tataka azladza uwana la abà, tasəl Zəzagəla aw, dzùgwaw la kaslà gesina kà mazlak atà. <sup>6</sup> Sèlàw kà say kagaw la gay namnamga, uwana akəs à vok. Ŋgaha sèlàw babay gay uwana kadawulawla à azladza, uwana tanava akul manavay gesina.

### *Ayyi makəf gəl à ahəŋ*

<sup>7</sup> Tisik, deda gay ləv gami uwana la tetəvi aŋa Sufəl la tsəh, masla adàh sləray aŋha la ləv tekula. Anu səla, anu azlaməna masləlay aŋa aŋha. Masla adəpəh à akul gesina lakəl gulo. <sup>8</sup> Kà uwaga à uwana gəsləl à akul à awtày kà masla mapəh à akul gay gami, ŋgaha kà masla madzərəcfàhakulla babay. <sup>9</sup> Onesəm, deda gay ləv gami ada à awtày atà səla. Masla babay anəfa Yesu Kristu la ləv tekula, masla, tsəhay aŋkul. Atà səla nna tadəpəh à akul azlatatak uwana ada à vok la abanay.

<sup>10</sup> Arəstarkus, uwana anu la daŋay anu səla, adaha à akul ala: ‘Ayyi’. Mark duguməŋ aŋa Barnabas adaha à akul ala ‘Ayyi’, babay. Baŋa tabəz à awtəy à slaka aŋkul kà, kəsəw atà la ahəl səla. Daŋay uwarə gədapəh à akul uwaga. <sup>11</sup> Yesu uwana tazaləl ala Yüstus adahakulla ‘Ayyi’ bay, azla Yahudiya makər uwaga pəra, à uwana mədàh sləray anina la abanay kà aŋa makoray Zəzagəla. Atà la uwana tadzərədəhəgəla kaykay.

<sup>12</sup> Epafəras, uwana tsəhay aŋkul adahakulla ‘Ayyi’ babay, masla kà, masla sləray aŋa Yesu Kristu. Koksikoksi adav kudfa à Zəzagəla kà aŋkul, kà akul aŋa madz à ahəŋ lela, kà akul aŋa magay azlazil la tetəvi aŋa Zəzagəla la tsəh, ŋgaha kà akul aŋa masəl uwana akəs à Zəzagəla à gəl ndzer. <sup>13</sup> Haday, gəsəl kà, masla as ŋgərpa la sləray la abà kà akul, ŋgaha kà azla Lawodikiya, ŋgaha kà azla Hiyerapoləs bay. <sup>14</sup> Luka, dokwtar uwana məwoya, atà la Demas tadahakulla: ‘Ayyi’.

<sup>15</sup> ‘Ayyi’, gòdàw à azladza la Lawodikiya. ‘Ayyi’, gòdàw à Nimfa, ŋgaha la azlaməna madiŋal gəl à vok uwana tahamàhəh gay à vok la mtəga aŋha, kà ahəl gulo.

<sup>16</sup> Baŋa kadadzenaw wakità uwanay kà, slələw à azlaməna madiŋal gəl à vok la Lawodikiya, kà atà aŋa madzenay babay. ŋgaha atà azla Lawodikiya bay tasləl à akul à waŋ wakità uwana gətsetser à atà kà, akul aŋa madzenay suwaŋ. <sup>17</sup> Gòdàw à Arsip kà: ‘Wàd vok à uda kà

madəv sləray uwana à gay Sufəl Yesu Kristu afal à ahəl.’

<sup>18</sup> Gi Pol, la ahəl gulo la uwana gətsetseray kà madàhakulla ‘Ayyi’ la abanay. Avika akul aw kà gi la daṇay.

Zəzagəla apis à akul gay à vok.

**Wakità Zəzagəla Wakitə Anja Makəs Vok  
Slawda Mawga (Cameroun)  
Matal: Wakitə Zəzagəla Wakitə Anja Makəs Vok  
Slawda Mawga (Cameroun) (New Testament)**

copyright © 2019 Wycliffe Bible Translators, Inc.

Language: (Matal)

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 13 Jul 2024 from source files  
dated 29 Jan 2022

03efbf2f-98ca-5534-8610-0be3a8c4b974